



أشباه الفيوم

سحر المحبة

قصة قصيرة

إيناس رمضان

سحر المحبة (قصة قصيرة)

الخانندار للنشر الالكتروني

العنوان: جوار مدرسة اللواء رفعت عاشور الثانوية- ميت سلسيل- الدقهلية
هاتف : ٠١٠٠٠٠٩٩٣٩٠

العنوان: سحر المحبة

الكاتب: إيناس رمضان

اخراج فني: الخانندار للنشر الالكتروني



جميع حقوق النشر الالكتروني محفوظة للكاتب/ة تحت اشراف موقع الخانندار
للنشر الالكتروني، و غير مسموح بنقله أو مشاركته أو نشره الكترونيا دون اذن
مكتوب من الكاتب



سحر المحبة

قصة قصيرة

إيناس رمضان

سحر المحبة

بالرغم من أني اتجوزت عن حب، وكنت حاسه اني هكون اسعد واحده في الدنيا بس الأيام الحلوة مش بتدوم ، انا مني اتجوزت وعشت انا وجوزي في بيت عيلة، حماتي عايشه في الدور الأول وانا في الدور الثالث، والرابع ده ساكن في سعد هو مراته وده اخو جوزي الكبير والثاني ساكن في اخوه احمد وده الصغير، حياتنا كانت عادية الصبح مصطفى ينزل يروح الشغل ويرجع يتغدي وينزل يروح على محل العطارة، كان محل كبير مفتوح على ناصية شارع ، وانا بعد ما اخلص شغل البيت انزل اشوف طلبات حماتي، واقعد معاها شوية لحد اما قرب ما يرجع مصطفى اطلع اروح شقتي، علاقتي كانت حلوة بسلفتي كنت بحبها وبحب أولادها، لأن ربنا ما رزقنيش بأولاد فكنت بعتر أولادها زي اولادي اللي مخلفتمش، من كام يوم حماتي قالتلي ...

_ ان ابنها أحمد خلاص هيتجوز وبما أن العروسة ابوها ميت قريب فا مش هيكون في فرح، بس هنعمل حفلة على الضيق في البيت هنا.

وبدأنا تجهيز الحفلة انا وشيماء مرات سعد، وكمان جت اخت جوزي مريم وبدأنا نجهز مع حماتي، الحاجات المطلوبه زي الاكل والحلويات اللي هتكون في الحفلة، انا ما شوفتش خطيبة أحمد لأنها من محافظة بعيدة، وكل ما أنوي اروح تحصل ظروف و مقدرش اروح معاهم، بس اللي سمعته منهم انها جميلة، كل حاجة كانت حلوة في حياتنا لحد يوم الفرح،اليوم اللي جت فيه ورده بيتنا أول ما شوفتها، انبهرت بجمالها هما قالوا انها حلوه بس هي كانت جميلة جدا ، حتي الصورة اللي شوفتها ليها كانت ظلماها، ساعتها اخدت بالي من حاجة عمري ما كنت اتخيل انها ممكن تحصل، مصطفى جوزي كان ببص على ورده كنت هتجنن الغيرة كانت هتموتني، انا بحبه أوي وهو كمان المفروض انه بيحبني لدرجة اني كنت كل ما قولة اتجوز عشان تخلف عيل ، كان يضايق ويقول...

_ انا مش عاوز ولاد، انا عاوزك انتي.

_ يعني عمرك ما هتندم على قرارك ده.

_ لأ انتي عندي بالدنيا.

دلوقتي بيص على واحده تاني وكمان مرات اخوه، بعد الحفلة ما خلصت، وكل واحد راح شقته دماغى كانت بتودي وتجب، هو كده ممكن مصطفى يبص لواحد ست تاني، يعني مصطفى ممكن يتجوز واحد غيري، يا خبر ده انا كنت اموت فضلت طول الليل أفكر اعمل ايه، لحد الصبح ما طلع نزلت عند حماتي كانت مرات سعد بتتكلم معها، أول لما حماتي شافتني بصتلي بأستغراب وقالت...

_ اومال فين مصطفى غريبة انه مش نازل معاي.

_ عاوز يريح النهاردة ومش هيروح الشغل.

بدأنا نجهز الغدا انا وشيماء مرات سعد وحماتي وكنا بنوضب في الشقة، وطول القعدة وحماتي بتتكلم عن سلفتنا الجديدة عن جمالها وعن شياكتها، كلامها خلاني اغير ما كنتش طايقة اشوفها قدامي، لدرجة ان شيماء اخدت بالها ضربتني في كتفي وقالت...

_ انتي باين على وشك أنك مش طيقاها حاولي ما تبينيش، عشان محدش يلاحظ حاجة ثم احنا ما شوفنهاش ولسه ما تعملناش معها.

_ مش سامعة من ساعة ما قعدنا وحماتك بتقول فيها شعر.

_ معلش هي لسه جديدة استني بس عليها لما حماتي تعرفها كويس، ثم جايز تطلع طيبة وبنت حلال ذيك كده يا مني.

بصيت لشيماء وما ردتش وكملت اللي بعملة، وشوية وجوزي مصطفى نزل، أول لما شافني قالي ...

_ جهزي الفطار يا مني وانا بجهز في جت وردة ومعها جوزها احمد، البنت كانت زي القمر وشيك جدا، حماي طبعاً أول لما شافتها رحبت بيها واحمد جوزها بصلها وقال...

_ شايفة يا ماما مراتي قمر ازاي.

كنت قاعدة جنب جوزي وحاسة اني هموت من الغيرة منها، بصيت على مصطفى وشوفته وهو بيبيص عليها من، وقت للتاني اتزفرت وقمت لدرجة ان حماي اخدت بالها، بس انا ماهميش ان حد يا خد باله، كل اللي همني هو كرامتي وجوزي اللي بيبيص لواحدة غيري ، لما شاف اللي عملته وهما قاعدين طلح ورايا الشقة ، ساعتها واجهته وقولتله...

_ اني شوفته وهو بيبيص على ورده انا نطقت وقولت كده .

وده أتجنن و زعقلي، وكان عاوز يضربني خاصمته وقعدت لوحدي في الشقة، لأنه حلف ليبات في الشغل ومش هيرجع البيت لحد اما اشيل الهبل اللي في دماغى ده، قعدت مع نفسي أفكر انا هعمل ايه اسيب جوزي وأطلق، بس ساعتها انا هخسر وهخسر كثير لانى بحب جوزي أوي وهو كمان بيحبني ، عشان كده قررت اني اقلدها مفيش غير كده، بدأت اقرب منها وشوية شوية بدأت أصحابها بقيت اشترى اللبس من المكان اللي بتشتري منه، بروح لنفس الكوافير اللي بتروحلة بس مفيش فايده هى برضوا كانت فارقة، كل حاجة معها مختلفة كرهت نفسي وكرهتها بقيت أتعمد أضايقها، وخصوصاً ان الكل في البيت بقي بيحبها والكل كان بيدافع عنها لو جبت سيرتها، حتي ولاد شيماء اللي كانوا متعلقين بيا حبوها هي اكثر عشان الألعاب اللي كانت بتشتريها ، والحواديت اللي بتحكىها ليهم، حسيت اني بتخفق حتي جوزي حساه بدأ يبعد عني، حتي مريم اخت جوزي قالتلي ...

_ انتي بتقلديها يامني في كل حاجة تقريبا لبسها طريقة كلامها صوتها، وده مش هيوصلك غير ان الناس تتريق عليكى ما تزعليش مني بس هي حاجة وانتي حاجة تاني،

اللي يليق عليها مش هيليق عليكي انتوا مختلفين.

كلامها صدمني وخلاني أعيد التفكير في كل حاجة، قعدت أفكر لحل يريحني من كل اللي انا في، وبعد تفكير كثير قررت أني لازم ابعتها عن البيت بأي شكل واي طريقة، سألت ناس كثير من أصحابي على شيخ؟. أو شيخة ممكن تساعدني انها تعملها سحر، أوي حاجة تخليها تسيب البيت، وبعد ما لفيت كثير عرفت بالشيخة جواهر، اللي حكته الحكاية كلها من اولها لأخرها وقالتلي بعد ما خلصت كلام...

_وتعمليلها ليه سحر يا بنتي انا هعملك سحر تاني من غير أذى لحد، هعملك سحر جلب يخلي جوزك يموت فيكي وعينه ما تشوفش غيرك.

_ بس انا نفسي ابعتها عن البيت.

_ انا ماليش في الأذى ثم انتي كل اللي يهملك جوزك ما يبصش لواحد تاني، بس استني انا عندي حل حلوا ايه رأيك لو عملتك سحر محبه ليهم.

_ هو ينفع يا شيخة جواهر.

_ اه ينفع طبعا بس كله بحسابه.

مشيت من عندها وانا فرحانه وسعيدة أوي، واتفقنا أني اجيب الفلوس بكرة وهي هتعملي السحر.

قبل ما اروح عدت على الصاغة، وبعث غويشة من الغوايش، اللي في ايدي عشان اعرف اتصرف في الفلوس واول لما الصبح جه لبست هدومي ورحت عندها، لقيتها مجهزة الحاجة اللي هتديها لي كانت قزازة لونها احمر، وحجاب وكام ورقة مكتوب فيها حروف أحطها في كوباية عصير، أو مائة أو أكل المهم يكون لمدة ثلاث أيام، اخدت الحاجة وكنت هطير من الفرح ورحت البيت، وحلفت اني احضر الغدا ليهم، وعملت الغداء والعصير وطلعت الورقة و حطيتها جوه الحلة، وغرفت عليها الاكل جوه الأطباق، وبعدها شلت

باقي الورق من الحلة ، وطلعتهم الاكل وحلفت اني هطيخ لمدة ثلاث ايام عشان وردة اللي نورت حياتنا، كلهم أكلوا وكانوا فرحانين مفيش غير شيماء قربت مني وقالت...

_ بت اوعي تكوني حاطة حاجة في الاكل.

_ انتي بتقولي ايه ما انا باكل معاكم اهو، مش انتي اللي كنتي بتقوليلي اغير معاملتي معاها.

_ طيب الحمد لله ان كلامي جاب نتيجة معاي.

بصتلها وابتسمت وبعد الاكل طلعت العصير من حظي الحلو، إن مصطفى جوزي مش يشرب غير عصير فراولة فتحت القزازه وضفت منها على العصير اللي جوزي هيشربه، معلقة صغيرة من القزازه اللي فيها المادة الحمراء، ومرة ورا مره حسيت بجوزي بيتغير معايا حتي حماقي بقت بتحبني اكثر من ورده الكل معاملته معايا اتغيرت، السؤال اللي كان هيجنني هو لحد امته هيفضلوا متغيرين معايا ، بس كنت برجع بسرعة واقول قبل ما يخلص مفعول السحر اروح اجدده تاني، المهم اني أكون سعيدة وممرور الوقت مصطفى بدا يتعب، بدأ وشه يبقي لونه مطفي ومتغير بدأ يشكي من ألم في معدته مع ان عمره ما اشتكي منها ، ده غير الصداع اللي ممكنش بيسيية خوفت لأكون انا السبب وخصوصا انه راح عند دكاترة كثير ، والكل قال ان مفيش عنده حاجة وان التعب ده ممكن يكون نفسي، كنت محتارة مابين انه يحبني زي ما كان بيحبني زمان وما بين انه يتعب واكون انا السبب ،عشان كده الحيرة كانت هتموتني، اللي قطع حيرتي ان مصطفى وقع من طولة في الشغل ، وأصحابه أخذوة على المستشفى وهناك الدكتور قالهم ...

_ انه شرب حاجة فيها مواد سامة ممتدة المفعول وكان ممكن لا قدر الله يموت فيها.

بس الحمد لله انهم لحقوة طبعاً مش عاوزه اقولكم، انه شك فيا لانه مش يشرب اي حاجة بره البيت، لما شوفته وهو اصحابه مطلعينة الشقة قلبي اتقطع، كنت بعيط لأنني احساسى بالذنب كان هيموتني، واحد ما شوفتش منه غير كل خير لدرجة انه رفض يجوز

عشان يخلف، وبعد ده كله اعمل في كده، حكته على كل حاجة دور وشه الناحية
التانية لما خلصت كلامي، وقالي ...

_ تعرفي يا مني انا كان نفسي أكمل، حياتي معاكي من غير خلفه وكنت راضي.

أول ما جيت اتكلم شاورلي عشان أسكت وكمل كلام ...

_ حتى لما اتهمتيني أني ببص لمرات أخويا كنت بلبس العذر واقول لنفسي دي، غيره
ستات لكن توصل أنك تأذيني، وتأذي اهلي بالشكل ده انتي مالكيش عيش معايا وده
آخر كلام ما بينا اتفضلي لمي هدومك وامشي.

عيط كتير كنت بترجاه يسامحني بس للاسف مرضيش منها لله جواهر هي السبب .

إيناس رمضان

